

四庫全書

史部

欽定四庫全書

史部

會稽續志卷三

四三

詳校官監察御史臣沈孫璉

檢討臣德生覆勘

總校官知縣臣楊懋珩

校對官中書臣李 棻

謄錄監生臣沈安邦

欽定四庫全書

會稽續志卷三

宋 張浚 撰

安撫司簽廳

屬官廨舍附

安撫司簽廳在府治儀門之西嘉定十六年汪綱重建而移門于儀門之外

參議機宜撫幹舊無廨舍皆僦居于市嘉定十六年汪綱以武憲舊衙拆而改創臚列有序參議滕璘作題名記紀之甚詳

通判廳

通判北廳在府治之東嘉定十七年夏通判府事沈繹
召為大理正繹去郡守汪綱亟捐錢二百萬重葺之於
是庭宇稍整潔便坐之前多植木樨嘉泰辛酉施宿因
名之曰桂堂有小圃頗幽雅一池清潔可愛嘉定甲
戌袁申儒臨池作亭名曰淥秀池傍環植以梅袁于梅
林中作亭摘曾子固憶越中梅詩冷香幽艷向誰開之
句名曰冷香又一亭亦袁作名曰逍遙遊曾子固倅越

劉貢父以詩送之云君為逍遙遊亭名本諸此袁又作
一室曰卧龍齋以其簷俯卧龍之麓也齋傍地形稍高
爽宜於觀眺湖山之勝盡在目前嘉定癸未沈繹作亭
命之曰會稽圖畫有井極清冽泉脈來自卧龍齊唐文
集有越州通判廳事後新鑿方井詩云卧龍山腳寒巖
底沮洳泥涂不記年疏引一朝逢智匠坐令咫尺變璇
淵待時藏用懷靈德濟物施功假世賢畱作越人歌詠
事召棠陰下酌貪泉惜開井之倅姓名不傳

通判南廳倅吏文卿創世綵堂其父定之時為江東倉使有記載其事後史安之為代葺治加備有水竹橋亭之勝

通判東廳乃員外置久廢不差解宇舊寓武憲廳嘉定十七年以監六部門顏耆仲為添差通判郡始葺路鈐廳為之先是有路鈐一員專一修奉攢宮十六年臺察李伯堅乞罷去路鈐降旨差通判一員專一主管至是始除耆仲云

簽廳

簽廳敝甚外限僅以竹籬見者陋之嘉定十七年守汪
綱重修及創倅幕位次重建兩廊大門於是稍稱大府
之體

鄉

餘姚

雙鴈鄉在餘姚縣東南一里孔晔記云虞國餘姚人為
日南太守有惠政行部有雙鴈隨軒翔舞秩滿還家鴈

亦隨歸遂生息成羣國死猶依其墓不去

上虞

游謝鄉俗傳謝康樂舊游

鎮

山陰

錢清鎮在縣西北五十里行人至此多有待潮過堰之
阻故陳淵有詩云江潮來去自有時扁舟閣淺心如飛
岸容霜竹青照眼春信梅花香撲衣天寒鄞江道路阻

歲晏錢清風俗非故園回首二千里落日看盡行雲歸

蕭山

西興鎮前志云西陵城在蕭山縣西十二里吳越武肅王以西陵非吉語遂改曰西興今按越絕書浙江南路西城者范蠡屯兵城也其陵固可守故謂之固陵詳此即今之西陵也越絕書所云圖經前志俱不曾引及惜哉呂祖謙有西興道中二絕云鳬鶩迎船自有情隨波故起綠鱗鱗野花照水開無主誰信春歸已兩旬桑麻

張主不知春帝恐鶯花太斷魂東岸紅霞西岸綠却將
影色為平分

漁浦鎮在縣西三十里梁丘希範宋謝靈運唐孟浩然
皆稱為魚浦潭對岸則為杭之龍山故潘閔詩云漁浦
風水急龍山煙火微

市

會稽

平水市在縣東二十五里元稹序白氏長慶集云予嘗

于平水市中見村校諸童競習歌詩召而問之皆對曰
先生教我樂天微之詩固亦不知予之為微之也其自
註云平水鏡湖傍草市名

蕭山

臨浦市在縣南三十里唐施肩吾詩有旅次臨浦市者
即此地也

上虞

五夫市在縣北三十五里有唐會昌三年余球五大夫

市新橋記刻于市中一石塔之下前志碑刻門云石不存蓋未嘗見此刻也

和買

太宗時馬元方為三司判官建言方春民乏絕時預給官錢貸之至夏秋令輸絹於官故曰和買然在昔止是一時權宜措置至於一歲之間或行於一郡邑而已祥符中王旭知潁州因歲饑出庫錢貸民約蠶熟人輸一緡其後李士衡行之陝西民以為便至熙寧新法之行

乃施之天下示為準則是時會稽民繁而貪所貸最多

此據王明清揮塵錄

後來錢既乏支所買之額不除遂以等戶資

產物力而科配焉然會稽為額獨重於他處故至今以
為病建炎三年九月二十四日御筆朕累下寬恤之詔
而迫於經費未能悉如所懷今聞東南和預買絹其弊
尤甚可下江浙減四分之一以寬民力紹興遂獲減免如
詔旨紹興二年九月十七日守臣朱勝非又有請詔蠲
免十分之一紹興八年二月二十八日以此郡和買太

重又減一萬匹其累減如此其數尚一十四萬六千九百三十八匹故淳熙中提點刑獄張詔乞用畝頭均科奏狀云浙東七州歲發和買二十八萬匹紹興一府獨當一路之半詔不知此是累減之數向來何止當一路之半耶淳熙八年閏三月一日指揮除豁德壽宮延祥莊泰寧寺并兩櫓宮及諸縣耕牛賃牛所科二千六百五十三匹三尺三寸淳熙十六年八月二十三日又特減四萬四千三百八十四匹三丈六尺七寸遂以一十

萬匹為額

內本色七萬九千三百八十一匹三尺九寸折帛二萬六百二十八匹三丈六尺一寸

陵寢

王明清揮麈錄紹興初昭慈聖憲皇后升遐曾紆以江東漕兼攝二浙應辦用元符末京西漕陳向故事也朝論欲建山陵紆議以為帝后陵寢今存伊洛不日復中原即歸祔矣宜以欽宮為名僉以為當遂用之後顯仁皇后祔永祐陵遂易殯為欽然欽宮之名實始于紆之請也

寧宗皇帝永茂陵其地乃泰寧寺之舊址也嘉定十七年冬命吏部侍郎楊暉為按行使暉歸奏云云獨泰寧寺之山岡偉特五峯在前直以上皇青山之雄翼以紫金白鹿之秀層巒朝拱氣象尊崇有端門旌旗簇仗之勢加以左右環抱顧視有情吉氣豐盈林木榮盛以此知先帝弓劍之藏蓋在于此尋令太史局卜格一起一伏至壬而後融結宜于此矣詔遷寺而以其基定卜

宮觀

在城

天慶觀在府之東南本唐之紫極宮也大中祥符中令州郡各建天慶觀郡即以此宮應詔至今屋宇塑像造多當時舊物嘉定十五年守臣汪綱以聖祖殿蓋瓦損漏木植亦多朽蠹乃重行整葺踰半載畢工簾帷供器易而新之以稱朝家崇奉之意又以錢二十萬命道士姜思正重建觀之兩廊于是祠庭之制益加整肅

會稽縣

告成觀在縣東南七里政和中即禹廟為之故自三清殿及三門兩廊皆政和以後所創獨禹廟為舊物梅梁至今猶在則其古可知矣嘉定十五年郡守汪綱視事來謁覩其朽損即命整葺既加蓋瓦又復甃砌于是殿宇內外丹堊彩飾燦然一新有古珪璧珮環藏于廟初紹興二十七年祠之前一日忽光焰閃爍人即其處斲之得焉乾道五年官命置籍圖其形使道士謹守之得珪歲月人已不詳獨王十朋會稽風俗賦云黃帝之鑑神

禹之壁注云紹興丁丑祠前光見人得之今所存環壁及梅梁識者以為皆非其真云

千秋鴻禧觀初賀知章入道以其所居宅為觀始曰千秋尋改天長乾道四年郡守丞相史忠定公奏移天長觀額建于縣東南五里嘉定十三年賜名千秋鴻禧仍為祠官典領之地前有亭曰鑑湖一曲又一亭曰懷賀皆史丞相建新額頒降守汪綱以觀褊小無以揭虔即更新之為屋六十餘間又增建真武殿先賢列仙祠并

賀祕監祠爽氣堂

綱有刻字留柱間云杜少陵為賀公作遺興詩有爽氣不可致之語真古

今絕倡千秋建堂以此名之

又築一園于觀之前曰賜榮

綱園門柱間題其上

云勅賜鑑湖水為君臺沼榮此太白憶賀監詩也千秋觀園成取詩中賜榮字以匾云

園有亭曰

幽襟曰逸興曰醒心曰迎棹皆綱所建又築長堤十里夾道皆種垂楊芙蓉有橋曰春波跨截湖面春和秋半花光林影左右映帶風景尤勝真越中清絕處也

龍瑞宮前志云在縣東南二十五里道家以為黃帝時嘗建候神館於此至唐神龍元年置懷仙館開元二年

因龍見改今額

按宮有石刻龍瑞宮山界至記不知何人所記乃賀知章書云宮自黃帝建候神館宋尚書孔靈產入道奏改懷仙館神龍元年再置開元二年敕葉天師醮龍現改龍瑞宮是則懷仙館自宋已有之唐不過再置爾此前志失於詳考也有龍現壇祈禱極感應嘉定十四年浙東提刑汪綱以早來禱設壇于宮忽有物蜿蜒于壇上體狀殊異不類凡虺人皆知神龍所變

化也繼而雨如傾注葉適有詩云感格孰如汪仲舉
步虛未了龍來語會稽秦望都洗清越人喚作提刑
雨蓋記實也汪既領郡事遂重建龍祠頗為嚴飾又
請於朝賜龍神廟額為嘉應廟云

寺院

圓通妙智教院在府東南有觀音大士素著靈異乾道
九年自浙以東旱甚錢公端禮來守以秋後四日開府
亟迎請罄其精禱應答如響注雨彌日歲遂中熟錢顧

院宇庫陋圯壞弗稱崇敬以狀驗諸朝詔賜度牒十五

道俾易其舊大士妙相乃錢武肅應夢來自永嘉

大士應夢

據王作重修院記云

報恩光孝禪寺在府南龜山龜山一名飛來山寺初名寶林唐光宅中舍利見改曰光宅乾符元年再建又改為應天元豐元年復曰寶林崇寧三年改崇寧萬壽禪寺尋又改崇寧為天寧有塔高二十三丈隨寺額以應天名錢端禮應天塔記云晉末有沙門曇彥與檀越許

詢玄度同造塔於山之椒彥有神異天降相輪故有應天之號前志拾遺門云應天塔今報恩寺浮圖也吳越春秋范蠡謂句踐曰王之築城其應天矣義取此錢參政端禮撰報恩寺塔記云天降相輪故有應天之號恐別有證

按范蠡此語自謂築城於釋氏事何預烏得謂塔名取于此後來取寺名欲表降相輪之異故云應天塔應天二字偶同范蠡之語耳非取諸此也

或云應天名塔特取

其高天降相輪理
涉妄誕殆非然也
紹興初以濮安懿王園廟寓焉郡

守汪綱以錢十萬令寺僧重加葺修於是庭宇益整
肅焉

戒珠寺在府東北舊志記載頗疎畧如寺初名昌安大
中六年改戒珠皆不登載

按唐咸通三年衢州刺史趙璘直書戒珠寺云浙東
觀察治其東北有山曰戴在晉為王逸少別址尚留
故池與祠堂又云陳太建初有天竺徒辨博神異及

死葬山上其形數見後夢語其門人曰必為卧像屋
之以壓我則不見為之果如言而所構華壯敞潔甲
於郭內所為晉安寺者後值會昌廢毀大中初復許
郡府量立寺宇而越州得其五昌安在詔中六年六
月又別以戒珠為名

會稽縣

泰寧禪寺在縣東南四十里舊號證慈紹興初詔卜昭慈
聖憲皇后攢宮以證慈視陵寺遂改賜今名自後永祐

諸陵修奉皆在焉嘉定十七年以其地充永茂陵攢宮
十月乃移寺于顏家山增創神位殿法堂方丈廊廡為
屋二百五十餘間深邃顯敞比舊不侔矣

淨勝院前志云在縣南二十里唐中和三年齊肇以其
祖丞相抗書堂建號水雲塔院治平二年改賜今額

按齊唐集有重葺聖壽寺詩唐自注云初遠祖相國
以所居石傘書堂建詩云建中天子寄彌綸築隱商
巖舊業存麟筆有文藏冊府

先祖兼
修國史

駟車流慶屬

衡門金繩寶構新空界劍樹真遊接九原貌矣諸孫
愧前躅脫身仍謝北山猿是院中間嘗為聖壽寺矣
前志不書蓋失於詳考也

山陰縣

本覺寺在縣西北十五里梅山有適南亭熙寧中郡守
程師孟所創適南蓋取莊周大鵬圖南之意云陸佃為
之記嘉定十五年郡守汪綱以其為梅子真故居因重
加整葺於是庭宇復還舊觀

天衣寺在縣西南三十里寺有唐人徐季海元微之白
樂天李公垂諸作者詩文碑刻有化身普賢及飛來銅
像化身普賢即晉僧曇翼棲此誦法華經感普賢應現
詳見李邕所作寺碑飛來銅像即海南維衛無量壽佛
像云是阿育王第四女以姿貌寢陋冀其端嚴捨金銅
冶鑄斯像四十九軀首飾火焰足飾蓮華布散天下為
衆生植福之本此山得其一靈異之跡見於王之道記
云

嵯縣

龍藏寺在縣北四十五里舊號龍宮院有巨井深浚水色紺寒疑有蛟龍居焉又有老松如龍數百年物也唐李紳少嘗經遊賦詩其序云此寺摧毀積歲貞元十八年予為布衣來遊有僧曰修真自言居龍宮寺謂予言異日必當鎮此為修此寺時以為狂易之言不之應至元和三年予以前進士為故薛華常侍招至越中此僧已卧疾使門人相告曩日所言必當鎮此修寺之托幸

勿見忘僧言寺有靈祇相告爾予問疾已不能對及後符其言而詢其存沒則僧及門人悉殂謝召僧會真以俸錢為葺之累月而畢以成其往願也寺成紳復為作文刻石以記故僧擇璘有詩云弔古有心懷短李拂塵無力看豐碑

餘姚縣

普滿寺在縣東北之十里前志云周顯德六年建號靈瑞塔院大中祥符元年改賜今額

按寺有一銅牌其上鐫刻云建除二年建此塔并屋舍因曰靈瑞塔院稱越為東都蓋是時尚屬吳越也兼有德韶國師名字韶善地理術故建立時預焉與前志所載歲月不同必前志誤也寺山即陳山有嚴子陵墓舊祠堂在廊廡間嘉定十七年郡守汪綱徙建於法堂之左仍創閣三間榜曰清風以誌景慕之意

上虞縣

法界院在縣北一十五里圖經及前志云唐咸通二年
建後唐同光二年吳越給利濟院額大中祥符改今額
按寺乃因利濟廟神而建寺有古斷碑云寶曆元年
掘石移基大和三年起門樓院宇等又唐人廟記云
院與廟名咸為利濟會昌五年天下廟庭例行停
廢惟此廟宇獨與留存後佛教重興一切仍舊詳見利濟
廟條下詳記所言是則咸通之前已為寺久矣烏得言
咸通二年方建利濟之名唐已稱之又安得云吳越

給額況自寶歷元年乙巳至咸通二年辛巳相去已
三十六年其誤已不待言

定善院在縣東南里餘俗呼為南塔初無勅額紹興中
李莊簡公光在政府以其先隴在縣之永豐鄉大雲塢
有守墳精舍因申明乞額賜名定善後其家以定善之
額移置此院院不知創自何時齊唐詩有題上虞南塔
院云鴈級指高冥登瞻地域靈路尋滄海斷山帶沃洲
青則南塔之名其亦久矣

新昌縣

寶相寺在縣西南五里齊僧護嘗隱于此護始到夜聞鐘磬仙樂之音又時現佛像煒暉可駭由是啓願鑿百尺彌勒像像成端嚴偉特名聞中外其取異者像自石中鑿出今佛身之後石壁之上有自然圓暈如大車輪正當佛首而四方闊狹一同無毫釐差佛身高廣則咸平僧端辨嘗記之云

按劉勰舊記齊永明四年有浮圖氏厥號僧護嘗茲

矢誓期三生恭造彌勒之像梁天監十二年二月始
經營開鑿之泊畢龕高一十一丈廣七丈深五丈佛
身通高一十丈座廣五丈有六尺其面自髮際至頤
長一丈八尺廣如之目長六尺三寸眉長七尺五寸
耳長一丈二尺鼻長五尺三寸口廣六尺二寸從髮
際至頂高一丈三尺指掌通長一丈二尺五寸廣六
尺五寸足亦如之兩膝跣趺相去四丈五尺壯麗殊
特四八之相罔弗畢具諒嘉陵并郡石像外至於斯

天下鮮可比擬者

祖印院在縣西南二十里初開元時僧神楷造維摩大
疏一十二卷映水就巖搏泥自像楷高僧也嘗為洛陽
西明首座明皇欽崇之遺址有菴上有瀑布泉下數百
尺驚雷濺雪動人耳目巖下清泉一滴烈日凍雨皆無
盈縮味清甘甲於衆水紹興十一年張浚嘗為院記云
惟嵯縣之南二十里有南巖相傳是海門大禹時決水
東注積砂成巖三山坡陀環繞其東斷如玉玦東晉永

和歲中高僧釋暉始小築於此五代時錢氏以院分屬
新昌唐朝賜額名咸通本朝治平初賜今額自天姥嶺
驛路斗折入小徑松杉排立如人物可數夾徑有兩浮
圖前有乳香巖雜花叢竹陸離可觀巖腹有仙骨巨棺
其險不可梯方臘寇入山從絕頂垂綆下窺棺中之藏
唯見所蛻骨甚大與今人異其色微紅如餘霞也後山
之巔有古釣車云是任公子以五十巨犗釣于會稽時
所作

祠廟

府郭

城隍顯寧廟在卧龍山之西南神州牧龐玉也自唐初立祠于此廟有梁開平武辰歲吳越錢王重修墻隍神廟記墻隍即城隍也武辰即戊辰也避朱梁諱故以墻代城武代戊也嘉定十七年郡守汪綱重修舊雖以一僧掌香火而實無棲止之所綱於祠之西別創佛室齋堂寮舍厨湏無不備具俾常居以供香火

鮑郎廟前志云鮑郎廟在府南二里二百四步不言鮑郎為何時人及立廟之因按輿地志鮑郎名蓋後漢鄧邑人為縣吏縣嘗俾捧牒入京留家酣飲踰月不行縣方詰責已而得報章果上達審究實然既死葬三十年忽夢謂妻曰吾當更生盍開吾塚妻疑不信再夢如初乃發棺其尸儼然如生第無氣息耳冥器完潔若日用者塚之四傍燈然不滅膏亦不銷郡人聚觀咸神怪之立祠以祀自梁大通以來靈應益著廟初曰永泰王廟

崇寧二年豐稷奏永泰犯哲宗陵名乞改為靈應詔如其請自後累封至忠嘉威烈惠濟廣靈王神鄮人而廟亦見於越者蓋唐開元以前未創為明州時鄮縣隸越故越亦有廟

會稽縣

昭順靈孝夫人廟在縣東七十二里曹娥鎮蓋漢上虞孝女曹娥也娥葬于祠之後祠在江之南江之北即隸上虞墓地及祠舊屬上虞不知何時撥入會稽也政和

中加封其誥中尚云越中上虞縣靈孝夫人則政和以

後方隸會稽神靈異昭彰往來沂潮濟江信若影響廟

舊曰貞孝

今廟中有古石刻尚存可考

天聖以後但呼曰曹娥廟蓋

避仁宗廟諱也大觀四年八月封靈孝夫人

告詞權中書舍人字

文粹政和五年十一月以高麗遣使入貢經從適值小

汛嚴祭借潮即獲感應麗人有請加封靈孝昭順夫人

告詞云勅越州上虞縣靈孝夫人爾以女子能達孝節

蹈水救父視死如歸精貫金石人稱至人麗人來享有

禱祠下義能體國響應甚明王人有言肆加封號仍葺

廟宇用嘉忠勤嗟爾有靈稱此休顯可特封靈孝昭順

夫人中書舍
人毛友行

淳熙中皇子魏王判明州經過亦值小汛
祈禱借潮感應廟歷歲久頽敝後有亭曰雙檜一日為
大風折木屋亦隨毀嘉定十七年郡守汪綱重修及再
建雙檜亭并娥父曹府君祠堂及朱娥祠堂前臨大江
汪復以錢五百萬命工壘石為隄凡七十丈以為風濤
之障

嘉應廟即龍瑞宮龍神之祠十七年七月汪綱有請于
朝賜廟額為嘉應蓋以禱雨有應云

嵯縣

嵯浦顯應廟在縣北四十五里慶元元年賜額神姓陳

名廓

神名據王十朋嵯山賦云

睦州青溪縣人嘗為台州永安縣令

永安即今之仙居

始過此見山水之勝絕陰有卜居之意秩滿

再經從忽舟覆遂溺死自爾靈顯民遂祠之稱為陳長官廟晉天福初有神兵之助遂封為上善濟物侯嘉泰三年樓公鑰修廟記云酈道元之註水經出于後魏已言嵯山北有嵯浦浦口有廟廟甚靈驗行人及樵伐者

皆先敬焉若相盜竊必為蛇虎所傷則廟已古矣幽冥之事不可究知傳記亦有謂靈祠間有以剛方之士代之者建炎金騎入越而叛兵欲犯邑境以神之威不戰而退乾道嘗賜香茗之奠丞相謝公深甫布衣時由丹丘赴南宮神已告之富貴之期是舉登科作尉此邑事之尤謹既登樞院賜廟額曰顯應公之力也

阮僊翁廟在縣南十里阮肇故宅也王十朋有詩云再入山中去煙霞鎖翠微故鄉遺宅在何日更來歸

餘姚縣

嚴先生祠在縣東北之十里陳山孫應時客星橋記云
自漢建武以來千餘年嚴先生之高風激越宇宙天下
尊之無異辭先生吾餘姚人也晚耕於富春山富春析
而為桐廬釣臺屬焉自文正范公建祠而記之釣臺之
名大顯崖石草木得以衣被風采發舒精神傳繪於天
下其邦人尤以為榮而吾邑之地靈人傑世反不傳非
闕歟土俗所記吾邑少東江瀨粼粼上下常有聲是為

子陵灘蓋其初之釣游處也東北十里有奇峰曰陳山

拔立千仞秀

闕

一方而叢石隆起在山之陰據峻陁俯

長川以望東海是為嚴先生墓蓋嘗家是山而歸葬也

旁又有

闕

曰嚴公山有古叢祠曰先生廟其應史如此

豈誣也哉乾道中故太師史公鎮越始告縣表墓道起
精舍曰客星菴而為之田長吏以時奉嘗

上虞縣

遺德廟有二一在五夫鎮一在法界院前志云利濟侯

廟在縣北二十五里今廢蓋失於稽考不知利濟侯廟即今遺德廟也

按慶歷甲申有李晏如得唐人所撰利濟廟記重刻于石兵火其刻不存里人尚以紙本轉相傳授其記云神周氏諱鵬舉字垂天會稽人東晉時登第初宰上虞守鴈門俄而心思退讓志務幽閑念昔上虞北曾遊魚浦湖遂乘白駒泛舟全家沒於水自是數示靈響民遂立祠奉之號曰仙官廟

詳見白馬湖條下

初廟於

湖孺神頗威肅民甚畏憚血食日盛明州天童僧德
曇聞之以慈力化導俾歸正覺自是祭奠唯用蔬茹
且願以廟庭為僧廬鄉人孔澤趙瑗謂地勢窪狹非
立伽藍之所咸請禱願遷于他所忽大風四起朱紱
及香爐皆隨風而去二人視其爐紱所止處聞之於
官官為奏陳旨令建置梵宇祠堂以院與廟名咸為
利濟政和元年以兩浙轉運司奏越州上虞縣白馬
湖上廟利濟侯祈求感應乞優賜爵號九月十七日

奉勅賜廟額曰遺德宣和七年八月封威惠侯

其勅詞云

浙部使者言上虞遺德廟當睦寇猖狂引兵壓境至若素旂出於廟中賊衆駭愕謂官軍已至因遂遁走赫然明靈實相天討保完一方朕甚嘉之其增禮命賜爵為侯以大震顯神之威德俾民報祀世其無怠宜特封
威惠侯 淳熙元年五月封靈佑威惠侯法界祠中尚藏吳越錢王所賜紫袍犀帶及鐵鞭之屬睦寇犯境有素旂之異者乃五夫祠也

通澤廣利侯廟前志云在縣南五十里即方石聖官吳越封通澤將軍熙寧八年封廣利侯云吳越封通澤將

軍失於稽考也

按天聖六年齊唐作重修豐利將軍廟記云神曰方石聖官乾德元年雲漢邁癘縣令盧釋躬禱于廟豐注如響一境霑足由是露板得請錫今號曰豐澤將軍云吳越所封誤矣豐澤前志云通澤蓋訛豐為通也

會稽續志卷三

欽定四庫全書

會稽續志卷四

宋 張浚 撰

山

府郭

卧龍山前志云吳越備史云遜王侑於卧龍山置園亭
為歌詩亭榭間紀錄皆滿卧龍山名始見於此前志未
詳

按元稹州宅詩序云州之子城因種山之勢盤繞迴

抱若卧龍形故取以為名是山名卧龍蓋始於元稹
錢鏐重修墻隍廟記有公署據卧龍高阜之語則昔
人稱之屢矣非始見於錢侔也刁約云府據卧龍山
為形勝處周圍數里盤屈於江湖之上狀卧龍也龍
之腹府宅也龍之口府東門也龍之尾西園也龍之
脊望海亭也味約之言山之形勢大畧可睹矣地產
茶張伯玉云卧龍山茶冠於吳越歲以充貢每歲則
易稱為瑞龍茶云

山陰

古博嶺在縣西四十里

俗訛為虎博

往多虎豹棲止故姚寬

詩云北風獵獵駕寒雲低壓平川路欲昏人馬忽驚俱
辟易一聲吼虎下前村

諸暨

五泄山在縣西南四十里有兩山夾谿造雲壁立雙瀑
飛瀉闕歷五級始下注溪壑故曰五泄飛沫如雪溟濛
數里淙激之聲雄於雷霆震撼巖谷過者駭焉刁約云

俗謂之小鴈蕩下有龍湫歲旱禱雨輒應寶元中僧咸
潤來游嘗作五泄山十題其序云平川孤越怪峰顛巒
轉入轉幽駭悅心目方之鴈蕩諒無慙焉所謂十題者
謂五泄西闕夾巖龍井石鼓石門石屏俱胝巖禱雨潭
桐星巖俱胝巖者昔有僧持誦俱胝咒於此因得名

蕭山

城山在縣西九里閩閩侵越句踐保城山山冢有泉多
嘉魚吳王意其乏水以鹽米來餽越取雙鯉報之吳兵

夜遁華鎮詩云兵家制勝舊多門贈答雍容亦解紛
緩報一雙文錦鯉坐歸十萬水犀軍

餘姚

羅壁山在縣南十八里晉郗愔卜居之地昔洛客來過
徘徊觀覽謂山川形勢具體金谷華鎮詩云山列翠屏
圍碧落溪流鳴玉繞平田郗家池館雖蕪沒金谷形容
宛自然

姜山在縣西北五十里山有五峯吳越智覺禪師延壽

有詩頗為人稱道讀之五峯之勝可以槩見其金

闕

高

闕

寒遠出羣

闕

德洞天雲散露花冠蛾眉峯

闕

盤空勢

闕

深洞

聲寒落石泉好是雨餘江上見水雲僧出認西天積翠

峰云翠壓羣峰地形直落日猿聲在空碧天風吹散斷

崖雲古松長露三秋色凌雲峰云煙蘿高巘勢凌雲影

瀉斜陽出海門曾與支公探隱去夜寒雷雨上方聞白

馬峰云湖外層峰瀉危瀑天際陰陰長寒木南北行人

望莫窮秋雲一片橫幽谷山中有一小池廣不及丈俗呼為姜女池姜女不知何時人山之得名亦以女也池之傍即淨凝教忠寺其水雖大旱不竭積雨不盈寺之飲濯皆取給焉池中草嘗蕪沒寺僧稍芟治即泉竭禱祈久之始如故此頗為異

上虞

東山在縣西南四十五里王銍遊東山記云會稽郡東百里曰曹娥江又曰東小江其南則晉太傅文靖謝公

安石東山也歸然出衆峰間拱揖蔽虧如鸞飛鳳舞山
林深蔚望不可見逮至山下於十嶂掩抱間得微徑循
石路而上今為國慶禪院即文靖故居也絕頂有謝公
調馬路白雲明月二堂遺址至北山川始軒豁呈露萬
峰林闕下視煙海渺然天然相接蓋萬里雲景也文靖
樂居其在茲乎山半有薔薇洞相傳文靖攜妓遊戲之
地雖蔓草荒寒然古色不改宛有六朝氣象

新昌

南明山在縣南五里舊名石城又名隱岳僧端辨云山

實天台之西門也吳越錢武肅王改曰南明

據錢惟演重修寶相

寺碑

有隱岳巖來谿塘仙髻峰等處

如白雲莊白鵬塢白蓮菴已見前志

古

梅一株生石罅中齊相井及書堂即唐齊顓隱居之地

鋸解峰斷石中裂章得象云狀如鋸截舊傳以為昔造

佛者試鋸于此石狻猊舊傳天台智顓大師死有二獸

來號吼作拜天叩地之狀逡巡化為石嘉祐中僧顯忠

詩云庭除兩狻猊一仰復一俯告天與叩地似欲訴憂

苦世傳智顗死二獸來瞻覩遂巡化為石埋在深土

事怪固難詰但見形可取風雨經交駁萬古萬古

顯忠

所詠凡十五
題見掇英

水

會稽

鏡湖輿地記稱曰南湖昔人又稱曰長湖大湖前志已
詳獨賀鑄引謝承會稽先賢傳謂湖本名慶湖皆圖志
所逸今備錄之鑄慶湖遺老集序云賀本慶氏后稷之

裔太伯始居吳至王僚遇公子光之禍王子慶忌挺身
奔衛妻子迸度浙水隱會稽上越人哀之予湖澤之田
俾擅其利表其族曰慶氏名其田曰慶湖今為鏡湖傳
訛也漢安帝時避帝本生諱改賀氏水亦號賀家湖家
牒載謝承會稽先賢傳敘略如此

山陰

南池在縣東南二十六里華鎮會稽覽古云句踐兵敗
棲會稽范蠡即山穿池毓魚鼈三年水陸之味不乏故

詩有君王旦暮方嘗膽猶築池塘長紫鱗之句

嵯縣

剡溪在縣南一百五十步王銍云剡溪古謂之了溪圖

志謂禹治水至此畢矣

前志云了溪在會稽縣東北十五里源出了山合縣南溪流入

于剡溪
其地非

餘姚

菁江在縣西一十五里明越舟楫往還經涉之所也唐權德輿送上虞丞詩云越郡佳山水菁山接上虞

漁浦湖前志云在縣西北六十里一名白馬湖舊經引夏侯曾先志云驛亭埭南有漁浦湖深處可二丈漢周舉乘白馬游而不出時人以為地仙白馬湖之名由此今按唐利濟廟記云晉周鵬舉初宰上虞後牧鴈門自後心思退讓志務幽閑俄辭建隼之榮遂厭剖魚之貴念昔會稽東上虞北曾遊魚浦每資賞眺之情頗愜嬉遊之趣舟泛清淖車乘白駒全家忽隱於靈源闔境但驚於神化俄而潛通肸鬯迴布威靈升為

水府之仙超統陰司之職又曰漁浦湖後改為白馬湖詳此則是湖以周鵬舉乘白馬沒水遂得名恐夏侯曾先得於傳聞而未詳故誤以周鵬舉為周舉也

上虞

飲牛溪在縣南五十里白道猷岩下石有繫牛足跡溪以此名

新昌

放馬澗在縣東三十二里沃州山西南支道林放馬之

所華鎮詩云春草茸茸澗水清路人猶記昔時名金羈
縱後霜蹄逸想見風前蹀躞聲

山陰蕭山運河

運河自蕭山縣西興六十里至錢清堰渡堰迤邐至府
城凡一百五里自西興至錢清一帶為潮泥淤塞深僅
二三尺舟楫往來不勝牽挽般駁之勞嘉定十四年郡
守汪綱申聞朝廷乞行開浚除本府自備工役錢米外
蒙朝廷支撥米三千石度牒七道計錢五千六百貫添

助支遣通計一萬三千貫於是河流通濟舟楫無阻人皆便之

橋梁

府城內

府橋在鎮東軍門外蓬萊館前舊以磚甃不能堅久守汪綱乃命更造盡易以石闌干華表加飾鴈馬橋既寬廣翕然成市遂為雄觀距府前百許步曰蓮華橋修亦如之其他以次繕完如拜王橋

舊傳吳越武肅王平董昌郡人拜謁于此橋故

以為名

西雙橋水澄橋皆圯毀之甚者殆不止十餘所今亦煥然改於其舊云

會稽

春波橋在縣東南五里千秋鴻禧觀前賀知章詩云離別家鄉歲月多近來人事半消磨惟有門前鑑湖水春風不改舊時波故取此名橋

山陰

柯橋在縣西二十里舊曰柯亭今有橋遂曰柯橋唐胡

曾詩云一宿柯亭月滿天笛亡人沒事空傳中郎在世
無甄別爭得名垂爾許年

蔡邕笛事
見前志

蕭山

錢清方家橋距縣四十五里

闕

江之西歲久斷圯守

汪綱重修寧宗御舟經從撤而復葺

餘姚

客星橋在縣東北一十五里陳山舊有橋工役不至屢
成屢壞淳熙十年僧清

闕

故作甃石如虹袤百五

十尺翼以石欄極為堅壯

闕

六年乃成里人以其在嚴

子陵墓側因命曰客星橋孫應

闕

為之記

上虞

五夫新橋在縣北三十五里五夫市有唐會昌三年余
球五大夫市新橋記

堤塘

清風安昌兩鄉實瀕大海有塘岸以禦風潮或遇圯損
隨即修築若易為力或浸不省

闕

歲積月怒濤益侵至

嘉定六年潰決餘五千丈冒民田蕩室廬

闕

沒轉徙者

二萬餘戶斥鹵漸壞者七萬餘畝歲失兩鄉賦入以萬

石計者四年于茲守趙彥倓請于朝頒降緡錢殆十萬

米萬六千餘石以益以留州錢千餘萬倉司被旨督辦

復致助

闕

秋興役築塘及裨修共六千一百二十丈砌

以石者三之一起湯灣迄王家浦以明年夏畢工會諸

暨縣民杜思齊以造偽獲罪家沒入郡又請買其田於

安邊所計五百七十八畝山園水塘三百七十二畝置

莊於古博嶺藏其祖委官掌之以備將來修築費又請
行下吏部今後差注山陰尉職添帶巡修海塘視成壞
以加勸懲刻碑郡庠龍泉葉為之記至守汪綱命時加
修護云

新堤在府城之西門距西興踰百里塘堤廢壞久矣外
為牽夫蹂踐內為田家侵掘混為泥塗往來艱阻夏潦
初興河流溢而大闕秋暘方熾田水泄而不留非特路
人病之也嘉定十四年郡守汪綱增築之徒行無褰裳

之苦舟行有挽絆之便田有畔岸水有儲積其利已博矣而又建施水坊於人烟不接之地凡八所各五間為中寮以憩過往之人且將規畫食利以資守防者為久長之計則其利豈特博而已哉

沙路在西興沙上直抵江岸長一千一百四十丈十七年冬汪綱以往來渡者病涉築此路以濟行人縻錢三千萬米千斛椿篠五萬有奇踰月而工成望之如砥修闊平廣人莫不以為利次年三月寧宗靈駕發引遂由

此捧擎徑達于河以避入閘沙漲之阻

菁江塘在會稽縣東七十餘里千秋鄉計長四百餘丈
嘉定七年內准朝廷下本府支撥錢一萬四千餘貫米
一千七百餘石砌疊尋為風潮所壞嘉定十六年郡守
汪綱重行修砌

鳥獸草木

鳥獸草木越中所產其名品之夥未易以一二數也今
掇其見稱於書傳間者備錄于此

花

牡丹自吳越時盛於會稽剡人尤好植之仲皎有詩云
玉稜金線曉粧寒妙入天工不可干老去只知空境界
淺紅深紫夢中看

芍藥越中所植其花大有過尺圍者而剡尤盛李易剡
山詩斑竹筍行三畝地紅藥花開一尺圍王十朋剡館
芍藥詩已過花王候纔聞侍者香來游禁酒地免作退
之狂

海棠李德裕平泉草木記曰木之奇者會稽之海棠沈立海棠記曰花中帶海字者從海外來

紅桂平泉草木記木之奇者稽山之海棠剡溪之紅桂記又有訪剡溪樵客得紅桂移植郊園詩云來自天姥岑長凝翠嵐色前又有越叟遺數株周人未嘗識之句意此桂在唐唯龍門敬善寺及剡中有之今所至婆婆森立不特剡也

百葉木芙蓉平泉草木記宛陵之紫丁香會稽之百葉

木芙蓉

四季桂有植於剡之雪館者城圃亦有之白居易詩有
木名丹桂四時常馥馥棗據詩芳林挺芳幹一歲三四
花

山茶平泉草木記曰得會稽之貞同山茗在唐唯會稽
有之其種今遍於四方矣

貞同平泉草木記云稽山之貞同其花鮮紅可愛而且
耐久

蘭越絕書曰句踐種蘭渚山舊經曰蘭渚山句踐種蘭之地王謝諸人脩禊蘭渚亭

茶蘼王十朋剡館茶蘼詩日烘香倍遠雨浥韻尤清但此白茶蘼爾近時士大夫圃中有黃者尤可愛

石巖花與杜鵑花本一種石巖先敷葉後著花其色丹如血杜鵑先著花後敷葉色差淡仲皎石巖花詩繁英歷歷爍晴空過了花間幾信風明日畫欄供徙倚却須有句到芳叢

四時杜鵑花平泉草木記得剡中之真紅桂稽山之四時杜鵑

杜鵑花王十朋會稽風俗賦天衣杜鵑東山薔薇注云天衣寺有杜鵑花最奇每歲盛開觀者競集越僧擇璘杜鵑花詩蠶老麥黃三月天青山處處有啼鵑斷崖幾樹深如血照水晴花暖欲燃三嘆鶴林成夢寐前生聞苑覓神仙小山拄頰愁無奈又怕聲聲聒夜眠越人謂之映山紅唐僧修睦有映山紅詩

瑞香剡中西太白山有此花盧天驥剡山睡香花詩云
入夢生香酒力微不須金鴨裊孤馡為嫌淡白非真色
故著仙家紫道衣時盧正在西山也了元瑞香譜曰盧
山瑞香比他郡最香信乎風物各有相宜吳曾漫錄云
廬山瑞香花天聖中始傳東坡諸公悉作瑞字廬山記
中載瑞香花及納禪師詩山中瑞采一朝出天下名香
獨見知張祠部以瑞為睡其詩曰曾向廬山睡裏聞香
風占斷世間春竊花莫撲枝頭蝶驚覺南窗半夢人今

餘姚上虞二邑之地亦宜此花城圃亦多不特剡也

古梅會稽餘姚皆有之老幹竒怪而綠蘚封枝苔絲四垂疎花點綴極為可愛他處所未見也俞亨宗詩云疎疎瘦蘂含清馥矯矯虬枝綴碧苔疑是髯龍離雪殿蒼鱗遙駕玉妃來

紅梅城圃中及他邑皆有盧天驥剡中同邑官登迎薰堂紅梅詩河陽滿縣栽桃李風過落花闕不起潘郎遠韻故不凡為米折腰聊爾爾剡溪詩尹亦可人作堂餉

客名迎薰雖無桃李繼潘令紅梅一窠香入雲自憐多
病繡衣客百年未半鬢先白長鞭短帽飽霜露田園將
蕪身未索何日背琴攜瘦筇鳴絃堂上迎薰風梅香已
斷葉初暗滿枝著子雙頰紅寄聲艇子可留意為我沿
溪撐短篷

千葉黃梅剡中為多王梅溪詩菊以黃為正梅惟白最
嘉徒勞千葉染不似雪中花

蠟梅越中近時頗有剡中為多花有紫心者青心者紫

者色濃香烈謂之辰州本蠟梅聲名自蘇黃始徐師川詩所謂江南舊時無蠟梅只是梅花臘月開王梅溪剡館蠟梅詩非蠟復非梅誰將蠟染腮遊蜂見還訝疑自蜜中來

菊前志云昌安門內朱氏莊有佳菊數十種今上原所藝名品亦多剡中高氏雪館種菊一二百本最奇者紫菊丹菊

白丁香剡山絕多

薔薇花越山處處有之唯剡中為盛山谷榛篁間最多
即梔子花也

薔薇越中頗多自舊見稱於人李白題東山云不見東
山久薔薇幾度花又有重臺百葉者平泉草木記稽山
之重臺薔薇又曰宛陵之紫丁香會稽之百葉薔薇

凌霄前志云山陰多有其蔓倚木直上故名元稹詩寒
竹秋雨重凌霄晚花落

杏與梅異前志已詳盧天驥剡中詩山杏枝頭鴨鵝兒

來傳春意語多時王銍杏花詩主人半醉點豐肌何待
武陵花下迷記得鞦韆歸後約黃昏新月粉墻低又醉
裏餘香夢裡雲又隨風雨去紛紛人間春色都多少莫
埽殘花斷盡魂

碧桃張說題剡金庭觀云他日洞天三十六碧桃花發
共師遊李光云吾里桃花色白而多葉樹萼皆碧世謂
之碧桃有詩見光文集

木蘭吳蛻鎮東軍監軍使院記云大厦前木蘭特異越

城之中稱為第一

鴛鴦梅王十朋會稽風俗賦云越有鴛鴦梅雙頭千葉

關

果

青櫛子出餘姚縣四明山陸龜蒙詩云山實號青櫛環
岡次第生外形堅綠殼中味敵瓊英皮日休亦有味
似雲腴美形如玉腦圓之句史忠定公詩云羽幘新從
帝所回餘歡未盡玳筵開醉拋青子香泥上留與仙家

取次栽

李越中固多唯剡溪者頗見稱唐李紳遊剡龍宮精舍
晝寢有老僧見一黑蛇上剡前李樹食其子復望東
序而去入紳懷中僧曰公睡中有所覩否李曰夢中登
李樹食李甚美似有一僧相逼乃寤僧知非常延遇甚
謹

櫻桃越有大小二種蕭山者勝剡亦有之李易剡山詩
豆角嘗新小麥秀來禽向長櫻桃肥

枇杷始寧塹多植此剡坑吳莊最多

林檎越中自昔有之故謝靈運山居賦曰枇杷林檎帶
谷映渚

蓮藕前志但稱禹廟前羅文藕而已今上虞亦出此大
率越多陂湖蓮最富杜荀鶴送人遊越詩有園皆種橘
無渚不生蓮可謂越之實錄也

木瓜本草云陶隱居曰山陰蘭亭尤多彼人以為良果
最療轉筋患時但呼其名及書患處作木瓜字皆愈不

可解

瓜已見前志又剡之西太平鄉產奇瓜紺翠如筍味絕佳庾信所謂美酒含蘭氣甘瓜開蜜筒齊靈敏剡人種瓜營葬朝採夕生

棗前志云其品之美者出諸暨蕭山然嵊縣嶠山棗灣又有一種青者

石榴越固有唯剡中者佳地近東陽故多榴房

葡萄廣志曰葡萄黃黑白三種越中間有碧葡萄王十

朋剡館葡萄詩珠帳纍纍挂龍鬚蔓蔓抽從渠能美釀
不要博涼州

栗本草云生山陰陶隱居曰今會稽最豐諸暨形大皮
厚不美剡及始寧皮薄而甜

榲平泉草木記曰木之奇者稽山之榲東坡詩彼美玉
山果榲為金槃實玉山屬東陽剡實接壤榲多美者

棖越中固有而剡為多張籍詩山路黃橙熟沙田紫芋
肥真剡中風物也梅聖俞詩越蘆橙熟久楚飯稻舂初

橘任昉述異記曰越多橘柚園越人歲稅謂之振橘戶

亦曰橘籍

今非其舊

柚列子曰吳越有木焉曰櫟碧實冬青實丹而味酸爾雅音義曰柚亦作櫟

蔬

載唐趙璘戒珠寺碑云載蔬類也句踐故城東北三里
有山曰載傳云昔越君所嗜故常採於此遂以名山本
草云作蔓生莖紫赤色葉似蕎麥而肥闊中謂之菹菜

王十朋有采葢詩

見續撮英他
已見前志

越瓜本草云生越中陳藏器云越瓜大者色正白越人當果食之去煩熱解酒毒又自有黃瓜菜瓜可充蔬茹云

草木

卷柏俗呼長生不死草生餘姚四明山雖甚枯槁得水即葱翠甚為異也謝靈運山居賦卷柏萬代而不殞則此物越山皆有之不特產於四明山也

仙茅出少微山齊唐有詩云玉澤反嬰看術驗少微山
是小三茅

山蔓菁惟餘姚縣龍泉山有之劉綱夫婦所種婦先綱
飛昇約綱云菜熟亦仙去朱翌詩云天上佳招飛鸞
驚人間春色到蔓菁

苧草輿地志云出上虞縣夏駕山土人織以為席甚細
密多接者為精蕭山亦有夏駕山亦云出苧草當考

鹿胎草獵士陳惠度射鹿剡山鹿孕而傷舐子死其處

生草曰鹿胎草

恒春草唐方士梁鍾進恒春詩東吳有靈草生彼剡溪
傍既亂莓苔色仍連菡萏香金膏徒騁壽石髓莫矜良
儻使露涓滴還遊不死方

石耳草生四明山絕壁少微山亦有齊唐有詩

木

仙樹在餘姚縣祠宇觀孫應時詩云劉樊蟬蛻此登仙
老木當時已插天玉骨半枯元秀潤蒼皮新長更榮鮮

蟠桃待熟三千歲銅狄重摩五百年化鶴未歸山寂寂
徘徊誰與問因緣

貝多木出諸暨縣寶掌巖寶掌禪師所植蓋數百年矣
檀可為車故曰彊須之木南渡初製五輅須檀為車軸
取諸剡至今郊年文移如舊

櫟水經曰謝靈運與惠連聯句刻孤潭櫟側詩曰山有
苞櫟爾雅注曰櫟有球彙自

梓梅福四明山記山生梓松栢水經謝玄居嶧山起樓

樓側桐梓森聳

桐謝車騎嶧江所居桐梓森聳人號桐亭

棟見謝靈運山居賦有花詩人稱之梅聖俞棟詩紫絲
暈粉綴鮮花綠羅布葉攢飛霞陳無已詩密葉已成蔭
高花初著枝

椿剡溪谷多此木孔德紹詩歲積松方偃年深椿欲秋
用莊子事妙絕

楮說文曰穀也陸璣草木疏曰江南以楮搗紙剡溪作

冰紙亦取此

黃楊梅福四明山記山生黃楊茗樹

檉出越中四明山為多見梅福四明山記及謝靈運山居賦爾雅曰檉河柳張衡南都賦注曰檉似柏而香

檜平泉草木記曰木之奇者會稽之檜爾雅曰檜柏葉松身

橡出剡中許渾詩霜肥橡栗留山鼠月冷菰蒲散水禽柞周處風土記曰始寧剡界山多柞木吳越之間名柞

為櫪爾雅曰栩杼柞樹也漢五柞宮多此木

石楠李白詩水春雲母碓風掃石楠花祖

闕

詩不知疊

嶂夜來雨侵曉石楠花亂流石楠二月花開剡山谷多此冬葉尤可愛

樟出剡中西陽雜俎曰江東人以樟為船張嶠詩白水汪汪滿稻畦樟花零落徧前溪

櫪輿地志曰越太平山生櫪木剡亦多此木最宜為櫪櫪越山有之李嘉祐詩子規夜啼櫪葉暗遠道春來半

是愁

相思木平泉草木記得稽山之相思木述異記曰戰國時魏有民戍秦妻思之卒塚上生木枝葉皆向夫所謂之相思木吳都賦曰相思之樹注曰樹理堅斜斫之有文可作器

枅櫚十道志曰會稽有枅山剡山谷多植山海經注曰枅一皮一節廣志曰枅櫚葉如車輪二月一採轉復一生

柘越中多有之非但葉可供蠶事其木紋理縝密而黃色可愛堪為器具謝靈運山居賦所謂木之最美者

闕
梓屬也

闕

闕
枌也

闕

槩山桑也

以上皆越山有之並見謝靈運山居賦

茶

前志載越中茶品甚詳而猶遺剡茶按唐僧清晝詩越人遺我剡溪茗採得金芽爨金鼎則剡茶自唐已著名

矣華鎮剡溪瀑布嶺仙茶詩云煙霞密邇神仙府草木
微滋亦有靈則剡茶見稱不特清畫而已剡茶有九曰
西太白山瀑布嶺仙茶曰五龍茶曰真如茶曰紫巖茶
曰鹿苑茶曰大崑茶曰小崑茶曰焙坑茶曰細坑茶
見高

氏剡
錄

竹

箭竹左傳曰東南之美有會稽之竹箭謝靈運山居賦
曰二箭殊葉注曰箬箭大葉筴箭小葉戴凱之竹譜曰

會稽箭最精節間三尺堅勁中矢

闕

簞竹西京雜記會稽貢竹簞號流黃簞

毛竹四明洞天記毛竹叢生澗邊又剡中金庭曰毛竹
洞天有毛竹李清叟詩雲藏毛竹深深洞煙起香爐裊
裊風

斑竹博物志曰洞天二女以涕揮竹盡斑述異記越中
有顧家斑竹至今人用以作牀椅及其他器具甚清雅
燕竹越人以其燕來時作筍取其早也因以為名華鎮

詩云竹箭黃芽欲老時杏梁日暖燕初歸他林尚聳千竿翠此筍先抽一握肥王十朋在剡有詩云問訊東牆竹佳名始得知龍孫初迸處燕子正來時

苦竹山陰縣有苦竹城越以封范蠡之子則越自昔產此竹矣謝靈運山居賦曰竹則四苦齊味謂黃苦青苦白苦紫苦也越又有烏末苦頓地苦掉顙苦湘簞苦油苦石斑苦苦筍以黃苞推第一謂之黃鸞苦孟浩然詩歲月青松老風霜苦竹餘

水竹謝靈運山居賦曰水竹別谷注曰水竹依水而生
甚細密然亦有大者

石竹謝靈運山居賦注曰石竹別叢闕以充屋椽巨者

竿挺之屬

慈竹生越山剡中尤多任昉述異記曰南中生子母竹
慈竹是也酉陽雜俎曰慈竹夏雨滴汁入地而生

桃枝竹梁元帝詩柯亭臨絕澗桃竹夾細流書曰篋席
蒲純孔安國曰篋桃枝竹也

笙竹越中俱有而剡為多字書曰笙竹名也有早竹晚

竹繇竹梅聖俞詩侵天笙竹溪

關東

關竹越中

關

為

關

南

上以為矛筍未竹時堪為弩絃

對青竹每節青黃左右相間越俗呼為黃金間碧玉又
曰閃竹又曰間竹或曰越閃竹即宋景文黃太史所謂
對青竹宋公贊曰翠溝如畫太史賦曰金碧其相

紫竹剡山谷間往往有之宋景文紫竹贊曰竹生三歲

色乃變紫

黃竹出蕭山越絕書云范蠡遺鞭於此生筍為林竹色皆黃

方竹中堅而外方玉岑山所植張忠定公詠方竹詩筍從初茁已方堅峻節凌霜更可憐

人面竹剡山有之竹徑幾寸近本逮二尺節極促四面參差竹書曰如魚鱗而凸頗類人面

淡竹越中有之竹類不一而本草所載惟篲竹苦竹淡

竹耳

蘆棲竹嵎縣嶧山有蘆栖灣王十朋嶧山賦曰靈禽忽翥於蘆栖竹譜曰竹膚是蘆浙江之東以為簾空於筆
笙竹今樂部作笙率以會稽卧龍山為貴
銀筍梅福四明山記山生毛竹銀筍

藥石

禹餘糧會稽及嵎縣了溪有之博物志曰禹治水棄餘食於江為禹餘糧顧況詩云宛委山裏禹餘糧石中黃

子黃金屑

石燕四明山記曰南峰之北巖生石燕

雲母本草云今杭越間亦有之生土石間或作片成層可析明滑光白者為上

紫石英本草云生泰山或會稽者形如石榴子楓橋採仙者佳

蛇黃本草云出嶺南蛇腹中得之重如錫黃黑青雜色有吐出者野人或得之圖經曰今越州亦有之大如彈

丸堅如石外黃內黑二月採云是蛇冬蟄時所含土到春發蟄吐之而去越所有者此也

紫苑平泉草木記得稽山之紫苑剡縣西山有之其苗謂之麝香菜

地黃剡地種之按謝靈運山居賦曰採石山之地黃則越產地黃其來久矣

木本草云生杭越等州葉葉相對上有毛方莖莖端生花淡紫碧紅數色

續斷本草云越州亦有之三月已後生苗榦四稜似苧
麻葉亦類之兩兩相對而生四月開花紅白色似益母
花

五味子本草云杭越間亦有春初生苗引赤蔓於高木
其長六七尺葉尖圓似杏葉三四月開黃白花類小蓮
花七月成青實熟乃紅紫

白芨本草云生冤句及越山春生苗長尺許似栟櫚及
藜蘆夏開花七月結實根似菱米有三角

劉寄奴本草云今出越州葉似菊高四五尺花白實黃白作穗蒿之類也

蔓荊子本草云越州多有之苗莖高四尺對節生枝初春因舊枝生葉至夏盛茂有花作穗淺紅色藥黃白色花下有青萼至秋結實斑黑如梧桐子大而輕虛

木鼈子本草云今杭越亦有之春生苗作蔓四月生黃花六月結實似括蒬子生青熟則紅其核似鼈故以為名每一實其核三四十枚

細辛出諸暨縣細辛隴山山多細辛因以為名

黃精出諸暨縣石鼓山人採之以黑豆同煮或蒸甘美
可食郡人唐秦系期王鍊師詩曰黃精蒸罷洗瓊杯林
下從留石上苔昨日鬪碁未終局且乘白鶴下山來
黃蘗出諸暨縣黃蘗山山以多黃蘗故名

厚朴出剡中平泉草木記稽山之樞檜剡溪之厚朴
紙

敲冰紙剡所出也張伯玉蓬萊閣詩敲冰呈好手織素

競交駕注越俗呼敲冰紙新安志紙敲冰為之益佳剡之極西水深潔山又多藤楮故亦以敲冰時為佳蓋冬水也

禽獸蟲魚

鷗項斯詩曰更望會稽何處是沙連竹箭白鷗羣

子規前志已詳李易剡山詩丁寧杜宇往江北為喚故人令早歸仲皎懷剡川故居詩蝴蝶夢中新歲病杜鵑聲裏故鄉愁越人謂之謝豹

畫眉越所在有之剡林谷唯多以其眉如畫故名

拖白練剡玉岑山最多尤可玩愛

黃雀白露來霜降去張芸叟詩所謂黃雀知時節清江足稻梁是也

鴨鵝舅也盧天驥剡中詩山杏枝頭鴨鵝兒來傳春信語多時張祐詩落日啼烏舅空林露寄生胡文恭公宿詩二月辛夷猶未落五更烏舅最先啼言鴨鵝啼最早也

吐綬鷄剡太白山有鷄五色吐綠綬號吐綬鳥古今注
曰吐綬鳥曰錦囊劉禹錫吐綬鳥詩越中有鳥形寥廓
喙中吐綬光若若李易太白山吐綬鳥詩昔人仙去斷
丹梯憔悴深山吐綬鷄百轉和鳴非我事漫將文采慰
幽棲

牛尾狸剡山谷產玉狸東坡所謂牛尾狸也

白魚剡嶧祠下巨潭白魚所聚大者二三尺頭昂者第

一尾頰者謂之追紅白

自鳥獸至是多高氏別錄

會稽續志卷四

欽定四庫全書

史部

會稽續志卷五

六五

詳校官監察御史臣沈孫璉

檢討臣德生覆勘

總校官知縣臣楊懋珩

校對官中書臣李棻

謄錄監生臣沈安邦

欽定四庫全書

會稽續志卷五

宋 張湜 撰

人物

前志紀載人物凡官至宰輔侍從則書故行義如趙宗萬
吳孜才學如齊唐華鎮博洽如姚宏姚寬或以不仕或
以官不達皆畧之夫記一方之人物要當以行義學識
優劣為取舍豈可以一時之官爵論耶又所記李光事
尤多舛誤如言紹興二十八年秦檜死光始以南郊赦

恩復官按國史檜死于紹興二十五年十月丙申是年十一月癸亥冬至郊祀十二月甲戌光量移郴州云二十八年檜死復官誤也又云卒年八十三光生於元豐戊午死於紹興己卯四月三日實年八十二云八十三亦誤也故悉為是正而別見于茲

趙宗萬字仲囷山陰人少知名錢忠懿器之入朝欲與之俱以親老辭不行既長博極書傳負經濟之術用進士應詔籍于春宮宗萬天資蕭散于世故淡如也

壯歲築室于郡之照水坊左瞰平湖前挹秦望畜一
鶴號丹砂引以為侶足跡不及於高門鼓琴讀書怡
然自適者三十餘年祥符中詔舉遺逸郡守康戩以
宗萬薦尋被召乃曰吾老矣不足以任事因獻跛鼈
傳以自見且請自託於道家者流朝廷不奪其志即
其家賜以羽服後十餘年卒華鎮言宗萬神宇清明
識度夷曠終日凝淡若嬰兒真方外之士然取捨去
就之際則確乎有不可奪者善八分草隸書通俞扁

之術或辟穀導氣嘗為詩曰斗懸金印心難動屏列
春山眼暫開蓋其志也所謂跛鼈傳者其旨大抵言
古先帝王自堯舜以來至于五代所以理亂興亡之
迹終設間以自喻謂能言之而莫之致猶跛鼈然故
以名其書觀其書始直有意于世天命不相卷以自
牧殆非山林枯槁繫而不食者也傳崧卿謂鎮言誠
確論也且為賦詩題其後云鶴書東召竟牢辭一去
騎鯨世莫追會有丹青遺像在誰將配食季真祠

齊唐字祖之山陰人唐開元中浙西觀察使澣之後少
貧苦學凡得書皆自寫誦過一二則不忘學識之博
人罕過之郡從事魏庭堅聞士也謂唐曰今之士多
不讀書唐曰幸公任意以几上書令唐一誦之如何
庭堅以一帙開示乃文選頭陀寺碑而唐誦不遺一
字魏大驚服登天聖八年進士第嘗進龍韜豹略賦
士大夫覽者皆震讜兩應制科祕閣皆首選兩對策
皆在第一當塗忌其切直復排去遷著作佐郎知杭

州富陽縣改祕書丞太常博士為南雄州簽判會交趾進麒麟唐據史傳非之斥蠻人紿中國衆服其博物以職方員外郎致仕初鑑湖東北有山巋然與會稽山禹廟相望最為山水奇偉之處唐命其山曰少微而卜築焉熙寧七年卒年八十七有學苑精英三十卷少微集三十卷

吳孜會稽人嘗從安定胡瑗學名馳于嘉祐治平間會郡謀建學孜即捨宅為基今學有祠堂存焉初學成

太守章伯玉至以便服坐堂上孜鳴鼓行學規伯玉欣然受其罰王十朋題其祠云右軍宅化空王寺祕監家為羽士宮惟有先生舊池館春風歸在杏壇中華鎮字安仁會稽人登元豐二年進士第官至朝奉大夫鎮好學博古工於詩文一時名人宗師多稱道之嘗為會稽覽古詩凡百餘篇山川人物上自虞夏至于五季爰暨國朝苟可傳者皆序而詠歌之歷按史策旁攷傳記以及稗官瑣語之所載咸見採撫傳崧

卿稱其詞格清麗興寄深婉足以垂觀來者子初平
登大觀三年第為太常博士討論典故據經考古無
所阿附靖康初爭金人尊號貽怒當塗及都城失守
二聖北狩初平竟以憂憤而卒

李光字泰發上虞人入太學登崇寧五年進士第調衢
州開化令知平江府常熟縣朱勔方以花石得幸勢
焰熏灼光不為屈械繫其奴勔怒諷轉運使移光知
吳江光即日以狀上于郡將致仕以歸會有直其事

者而光挺挺自若勛終不能害也宣和二年召為太常博士五年遷司封員外郎因進對極論時事語及用事大臣黜知桂州陽朔縣召為司勳員外郎遷符寶郎欽宗即位權右司諫首論宦官譚稹梁方平喪師辱國梁師成締交蔡京王黼表裏蒙蔽罪皆當誅遷侍御史極論蔡攸朱勛姦惡請正典刑有彗星出寅艮間議者謂外裔滅亡之證光言春秋書災異以戒人君不聞歸之外裔疏奏耿南仲力排之謫監汀

州酒稅建炎元年高宗即位于南京除祕書少監趣
赴行在會杭寇陳通為變道路不通未及供職除知
江州力辭得請主管西京崇福宮三年五月除知宣
州九月南陵報水軍叛于繁昌逼縣境光遣奇兵夜
擊之賊潰十一月金人入寇郡縣皆不能支光獨力
修守備金人不敢入境先是宣之諸邑上供秋租廩
藏水際以便舟楫光悉令輸郡廩人初不謂然及後
城困幾月贍兵養民賴此以濟始服光之先識巨盜

戚方破寧國抵城下光即日下令戒嚴民六十以下十五以上悉登城違者並以軍法光設牙帳于南壁躬撫士卒賊圍益急或請光盡室從西門遁去光曰我一家獲全其奈一城生靈何詰朝誦言于衆曰昨暮有教光攜家潛出者當以軍法從事姑且置之城脫或不保引劍之計已決義不汙賊手兵民感泣其氣益倍賊兵百道來攻光隨宜應之賊所屬意急攻者唯南壁咸負戶而登守者束薪芻灌以油作火牛

乘風投之盡熱賊所負其衆披靡城中遙見昭亭山
神數見人心益安南水門有神龍尾兩歧見于光衣
間每賊攻急龍輒至光即其所立祠以禱援兵至賊
自焚攻具請降光不許遂夜燒營遁去

据樞密樓
宣城事實修

入除徽猷閣待制知臨安府紹興元年九月除知婺
州甫到郡即入為吏部侍郎紹興二年除吏部尚書
大將韓世清本苗劉黨久駐宣州橫甚至擅發倉庫
招收逋逃朝廷調發不行光奏若不速行處置竊慮

日復一日滋蔓難圖伏望密詔大臣乘其未發早賜
驅除未幾除光淮西招撫使將帶神武軍統制王瓊
一軍人馬以行因諉光取道宣城分揀世清一軍面
授密旨宰執皆不預聞陛辭日賜金帶象笏且有
大用之語是時朝廷草創國用未裕雖宰相猶服犀帶
是賜蓋異恩也光以二月晦日至宣城駐於城外光
度世清越日必至講月旦賀禮預設方畧以待之詰
旦果至光使人就縛于坐世清出語頗不遜光呼創

子至欲行軍法世清倉皇但乞憐而已光命檻赴行
在即出所降黃榜入城曉諭兵衆於一日之間分隸
其兵莫敢有喘息者世清悍將其軍精勇是行老屬
為光危之而光乃擒之于談笑之頃世清至行在竟
正典刑三月除端明殿學士江南東路安撫大使兼
知建康府兼壽春滁濠廬和無為宣撫使時太平州
軍兵陸德為變囚守臣殺兵官據城以叛朝廷就委
光措置遂盡擒德黨尋為言者所攻遂奉祠去五年

二月除知湖州七月除知平江府十一月除禮部尚書六年除知温州七年除江南西路安撫大使八年五月除安撫制置大使十月除吏部尚書十二月除參知政事秦檜新得政藉光舊望以鎮服中外時金方通和檜欲弛兵撤淮甸武備收諸將兵權光極言其不可檜以光異已頗怨之會有旨令宰執侍從各薦西北流寓之士光前後所薦凡三十餘人多知名士檜皆指為朋黨置不問一日與光辯論于上前詰

難再三檜辭光因奏觀檜之意是欲壅蔽陛下耳目
竊弄威柄誤國莫大于此願陛下察之明日留身乞
去上曰卿昨面叱秦檜舉措如古人朕退而嘆息方
寄卿以腹心何乃引去光奏臣與宰相爭論不可留
章九上除資政殿學士與郡光辭改提舉臨安府洞
霄宮十一年安置藤州十四年移瓊州二十年移昌
化光既再謫潘良貴程瑤胡寅皆以通書奪官或鐫
職二十五年秦檜死始量移郴州二十八年聽自便

二十九年卒于蘄州年八十二孝宗皇帝登極追復
資政殿學士尋賜諡莊簡紹興初戚方寇宣城光極
力守禦城賴以全宣人德之相與繪像建祠淳熙初
守臣因邦人之意請于朝詔賜廟額曰褒烈初光嘗
從劉安世講學得其精微故晚年遷謫深入瘴地遠
涉鯨海畧不以為意人謂于死生禍福之際無所屈
撓實似安世云在海外自號博物居士日講周易一
卦因著易傳十卷其他著述有文集四十卷兵畧十

卷神仙傳十卷其諸子皆知名孟博字文約紹興五年進士第三人及第光貶嶺南孟博常隨侍召試館職亦不就竟卒于瓊州蓋自登科未嘗一日出仕聰敏強記為文精于楚辭享年不永人甚惜之孟堅字文通少以果毅力學見稱于里之先輩光謫嶺南會有告其家有私史孟堅竟坐罪除名竄峽州檜死始復故官為常州晉陵丞葉衡力薦于朝有旨就差知無錫縣甫及歲諸司以治績聞孝宗命召赴行在暨

入對上問及家世又以治效之美形之褒語即除知秀州遷提舉淮東常平茶鹽事乾道五年卒年五十五孟珍字文潛善行草當時得其簡牘人皆珍藏之嘗擢守江陰及沿海制置司叅議官皆不赴淳熙十一年卒年五十六孟傳字文授少講學有聲而天資爽邁無纖毫世俗之氣當世聞人如曾幾徐度賀允中汪應辰張孝祥諸公一見皆器遇之與之游從宰明州象山秩滿主管官誥院遷太府寺丞權考功郎

出知江州處州提舉福建常平茶事提點浙西刑獄
尋奉祠里居久之乞掛冠除直寶謨閣致仕性嗜書
至老不厭藏書萬卷悉置左右繙閱紬繹周而復始
每得異書手自校勘竟其編乃止多識典故及前輩
出處中朝舊事歷歷能道本末有如目覩嘉定十二
年卒年八十四有磐溪詩文藁五十卷宏詞類藁十
卷讀史十卷雜志十卷記善記異錄各五卷

姚寬字令威峨縣人以父舜明任補官少有令望筮仕

之始一時名流爭禮致之呂頤浩李光帥江東皆招置幙中傳崧卿繼至以主管機宜文字辟之辭不就崧卿移書交舊有愧恨之語秦檜執政以舊怨抑而不用寬亦不屈已求進後以賀允中徐林張孝祥等薦入監進奏院六部門權尚書戶部員外郎兼權金倉二部屯田郎樞密院編修官寬博學強記于天文推算尤精完顏亮入境中外皆以為憂直云金百萬何可當惟有退保爾寬獨抗論沮止且上書執政言

今八月歲入翼明年七月入軫又其行在己巳者東南屏蔽也昔越得歲而吳伐越吳卒以亡晉得歲而苻堅伐晉堅隨以滅今金人背盟犯歲滅亡指日可待又推太一熒惑所次亮必滅之兆未幾亮果自斃從上幸金陵以其言驗令除郎召對上首問歲星之詳寬敷奏移晷復論當世要務奏未畢疾作仆於榻前上面諭令優假將理竢愈復入對後一日卒上甚念之特官其一子且用其弟憲于朝

此據寬所上執政書及王明清

揮麈錄後葉適

闕

參以國史修入

寬詞章之外頗工於篆隸及

工技之事嘗謂守險莫如弩因裒集古今用弩事實
及造弩制度為弩守書以獻且請用韓世忠舊法以
意增損為三弓合蟬弩詔許之既成矢激二里所中
皆飲羽又嘗論大駕鹵簿指南車得古不傳之法他
所著有西溪集十卷注司馬遷史記一百三十卷補
注戰國策三十一卷五行秘記一卷西溪叢語一卷
玉璽書一卷注韓文公集未畢尚數卷寬每語人曰

古稱圖書豈可偏廢故其注史記戰國策辭有所不盡必畫而為圖於文最得于詩葉適云寬古樂府流麗哀思頗雜近體詩絕去尖巧乃全造古律加於作者一等矣為當世推重如此卒年五十八兄宏字令聲少有材名呂頤浩為相薦為刪定官後忤秦檜死

大理獄

詳見七卷
雜記中

王厚之字順伯世本臨川人左丞安禮四世孫也祖榕始徙居于諸暨紹興二十六年厚之以越鄉薦為舉

首尋入太學登乾道二年進士第由祕書郎出為淮南轉運判官召為度支郎兩浙轉運判官知臨安府提點坑冶鑄錢提點江東刑獄上章乞致仕詔進直寶文閣從所請厚之好古博雅富藏先代彝器及金石刻與尤袤俱以博古知名于時嘗取古今碑刻叅訂而詳著之號復齋金石錄嘉泰四年卒年七十四陸游字務觀山陰人左丞相之孫自少穎悟學問該貫文辭超邁酷喜為詩其他誌銘記序之文皆深造三

昧尤熟識先朝典故沿革人物出處以故聲名振耀
當世張孝祥自謂辭翰獨步一時每見輒傾下之初
高宗聞其名欲召用而游以口語觸秦檜故抑不得
進紹興三十二年召對上俯加問勞玉音褒拂至于
再三賜進士出身嘗為刪定編修官出監郡典州持
部使者節久之再入為禮部郎以直華文閣致仕後
落致仕召為祕書監專修國史未幾以寶謨閣待制
奉祠還里再乞致仕嘉定二年卒年八十有五有劍

南詩藁二十卷續藁六十七卷渭南集四十五卷行
於世

黃度字文叔新昌人登隆興元年進士第淳熙十六年
差監登聞鼓院遷國子監主簿紹興四年九月遷監
察御史蜀將吳玠死度曰國家徒倚世將杆金而不
為蜀慮蜀郡歲舉緡錢四十餘萬溯流而運名曰餽
邊實富吳氏民力盡矣成都非用武國本賴梓潼號
東西川劍閣漢中翼遮于外昔人守蜀之常也今內

無一兵若吳氏南指兩川雖朝廷有區區制置使何足抗哉天幸挺忽死子弟未有異望急合興利為一民力可以少寬是日上反復語蜀事至盱遂以張詔為興州都統制而合興利分東西川執政莫敢任責後挺子曦復歸興州竟以蜀叛皆如度言紹熙二年光宗始以疾不過重華宮上書極諫言甚切至尋遷御史復連疏極諫既不聽累乞罷去孝宗崩寧宗召復為御史如故遷右正言知閣韓侂冑出入宮禁弄

權植黨有陵駕當世之心度具疏乞對侂冑聞之遽
請御筆除度直寶謨閣知平江府度力辭于申省狀
備言崇觀間蔡京當國始挾主威以制天下凡所施
行必請御筆可謂深戒辭之至再詔以所除職主管
建寧府冲佑觀俄起知婺州坐不發蘭溪知縣贓罪
罷嘉定元年召除太常少卿遷吏部侍郎出知福州
除龍圖閣待制移知建康府兼江淮制置使值歲歉
殍殍相望室廬半空度力拯救之活飢民百六萬八

千為錢四十六萬緡米九萬五千石又奏蠲錢一十九萬九千貫米四萬四千石入為禮部尚書以病請去除煥章閣學士知隆興府改提舉萬壽宮嘉定六年卒年七十六度平生淡泊一室蕭然無耳目之娛獨嗜書至老不倦自六經百氏天象地理禮樂官名井田兵法莫不研究有書說二十卷詩說三十卷周易說五卷歷代邊防六卷藝祖憲監三卷仁皇從諫錄三卷奏議及雜著一編屯田便宜一卷

莫子純字粹中初以仲父文清公叔光郊恩補官銓試
及試江東運司俱為第一人慶元二年禮部奏名復
為第一是歲有旨遵故事免廷策徑賜進士及第簽
書平江軍節度判官廳公事除祕書省正字校書郎
著作郎起居舍人兼直學士院起居郎中書舍人蘇
師旦本平江筆吏韓侂冑任為腹心氣燄熏炙一時
士大夫急于求進者爭趨其門一日遇子純于都堂
趨前執禮甚恭子純略不為禮師旦愧見左右已深

恨之會師旦當遷官子純復以為不可于是忤仇胄
意遂以事去知贛州加右文殿修撰知江州不赴改
知温州提舉江州太平興國宮嘉定八年卒年五十
七子純性姿聰悟博聞強記立朝之節始終可攷士
論歸之

俞亨宗字兼善山陰人登隆興二年進士第洪文惠公
适帥越聞亨宗行義延置郡齋又偕至番陽與文惠
之弟樞密遵內翰邁游日以文章為事嘗為博學宏

詞科之業三洪公讀之謂曰他日玉堂揮翰可也宰
常州宜興秩滿幹辦諸軍審計司遷國子監主簿軍
器監主簿知漳州先是州以鹽抑民計口請給督促
其直急于常賦至有鹽不給而責其直民甚苦之亨
宗首罷之又罷溪港津渡之權聽民往來無禁及減
去經總制錢後來額外苛取者歲罷緡錢合四萬四
千又代民輸丁錢一萬六千有奇秩滿凡橐中所餘
悉散之宗族親戚之貧者自漳州還奉祠里居杜門

不復出嘉定初起為提點江淮等路鑄錢公事移江東轉運入為吏部郎大理少卿祕書少監自以年老乞掛冠章凡六上除直顯謨閣主管成都府玉局觀既歸累告老增一秩加祕閣修撰如所請嘉定十五年卒年八十九亨宗初為臨川主簿為文謁廟大槩謂肩輿擔負迎盜于室雖至愚無知者不為吏郡邑無小大至之日民相與出力迎致謂其人足以庇于躬而無害于家也庇之不能而害及焉是盜也夫何

願而迎其語亨宗蓋終身行之自奉儉約衣食器用
質素粗充官雖稍遂弊屋頽牆處之泰然著述有垂
軒藁二十卷宏詞習業五卷山林思古錄十卷羣經
感發十卷

潘時字德廊家世婺之金華生于靖康丙午父良佐苦
學篤行表率諸弟躬授以經皆卓然有立公早孤與
兄甸養于叔父待制默成先生良貴家既長命之以
官默成與參政莊簡李公光為忘年道義之交情好

篤甚故莊簡以第五女歸公因家于紹興上虞之五
夫端方溫雅得于天資兩家父兄學問氣節冠冕一
時聞見超尚自幼覓異為袁州分宜簿監兩浙轉運
司造船場改秩提轄行在雜買務雜賣場知興化軍
浙西提舉改江東提舉罷主管台州崇道觀湖北提
舉湖南提刑知廣州廣東經略知潭州湖南安撫有
旨赴行在奏事除左司郎官改直顯謨閣知太平州
淳熙己酉七月以疾終享年六十有四莊重峭直嚴

正聰明初為壻時莊簡李公為秦丞相擠排投棄嶺
海家道零散親家陸升之告訐以興獄子壻沈陳擺
縱而脫身公獨毅然與令人李氏朝夕岳母管夫人
之旁相其家事始終如一人已占其器識自為小官
嚴整有法度所至馳聲及為監司帥臣平決冤獄安
集軍民風采振揚小大畏服至于歐顏楷法冰斯
篆古義獻草聖漢唐八分書皆造其妙刻石流傳人
以為法子二人友端登甲辰進士第為太學博士聰

敏俊秀從南軒張公超然有得士類服從授徒里門
屢滿戶外友恭為江淮宣撫司幹官詳雅沈靜從晦
菴朱公深造理趣居官可紀居鄉有行女一人適今
丞相史魯公端潔溫良婦德可著雖居榮貴專意儉
勤儆戒相成婉古女士友恭之子履孫通判江陵府
亦克世其家云

孫應時字季和餘姚人父介躬行古道訓授閭里鄉人
尊之號雪齋先生公天才穎異陶冶嚴訓八歲能屬

文乾道壬辰入太學年方弱冠從江西象山陸公九
淵悟存心養性之學登淳熙乙未進士第初尉黃巖
士民惜其去欲共置田宅留居焉辭不受朱文公熹
為常平使者一見即與定交紹熙壬子文定丘公密
帥蜀辟入制幙興元帥吳氏將有世襲之勢朝廷患
之而未敢輕有變易也丘公因其病使公往視疾以
察軍情盛禮正獻辟焉復命以事實告會吳挺死即
白制帥定議差統制官權領其軍檄總領楊輔兼利

西安撫節制之草奏乞別選帥材以代吳氏朝廷從之以張詔為興州都統一方晏然改秩知平江府常熟縣既滿郡將以私憾据撫倉粟累政流欠三千斛見問士民感德至相率以負詣郡願代償不報竟坐貶秩故公有詩謝其邑人云牛車擔負愧高義豈知薄命非兒寬授通判邵武軍將赴而卒年五十三自號燭湖居士有文集十卷開禧丁卯吳挺之子曦復歸興元果據軍以叛曦誅嘉定初戶侍沈公執刑事

蔡公幼學給事曾公暉吏侍黃公度兵侍戴公溪工
侍汪公達六人同奏公問學深醇行義修飭見微慮
遠能為國家弭患于未形乞甄錄其後得旨特補其
子祖開下州文學水心先生葉公適嘗賦其家世友
堂詩曰雀尋屋角飛燕遶簾櫳窺共賀新宇就生物
欣有依含德厚乃祖義完嗟利隳更悲別駕公積韞
不盡施溫恭化羣從遜悌流深規一絲必同袍粒黍
無異炊感零天上露潤浹園中葵魚鱗雖芳鮮不如

此菜肥涼風送佳音桂林自生枝借子赤霄羽登君
文石墀樸斲吁已勤礮密審所宜諒為前峰近長映

客星垂

君家對峯
即子陵墓

跋語云雪齋孫不朋居餘姚燭湖

上安貧樂道終身不願仕有古人之節三子應求應
符應時皆以文學知名兄弟相愛友卉衣草食薄厚
必均應時官止邵武軍通判應符之子祖祐敬踐祖
德崇緝先志嘉定甲戌為新堂名曰世友合善同室
期永不替將請予記之然此詩已畧具矣

會稽續志卷五